

Danmarkimi Nationalbanki pillugu inatsisip allanngortinneqarnissaa pillugu inatsisip Kungip peqqussutaatigut Kalaallit Nunaannut atuuttussanngortinnissaanut innersuusutissaq pillugu Inatsisartut aalajaangiiffisassaatus siunnersuut.

Saqqummiussaq

(Inuusutissarsiornermut Aatsitassanullu Naalakkersuisoq)

Siullermeenera

Inatsisissatut siunnersuutikkut siunnersuutigineqarpoq, qularnaatsumik aningaasaqarnerup attatiinnarnissaanut paasissutissat pisariaqartinneqartut Nationalbankip katersornissaanut atornissaanullu toqqaannartumik piginnaatinneqalernissaa, kiisalu aningaasanik kaaviiartitsinik attartortitsisarnerlu pisariillisarniarlugit malittarisassiorniarlugillu.

Inatsisissatut siunnersuutikkut Nationalbanken paasissutissat katersukkani atorsinnaalissavai, ilaatigut aningaasaqarnikkut aalajaassutsimik nalilersueqqissaarsinnaalluni nalilersuinnaallunilu, aningaaseriviit aningaasanik tigoriaannarnik ajornartorsiuteqartut nalilersornissaannut kiisalu aningaasanik ingerlatsineq nunallu aningaasaannut allanut tunngasut suliarinissaannut atorsinnaallugit. Tamatuma saniatigut europami ESCB-mik (Europami qitiusumik aningaaseriviit suleqatigiiffiannik) kiisalu ESRB-mik (Det Europæiske System af Centralbanker) og ESRB (The European Systemic Risk Board) suleqateqarnermut atasumik paasissutissanik isertuussanik erseqqinnerusumik killilikkamik Nationalbanken ingerlatitseqqissinnaassaaq.

Inatsimmik allannguinermut tunuliaqutaasoq tassaavoq aningaasaqarnikkut ajornartorsiorneq, tassuunakkut paasinarsimmat aningaaseriviit ataasiakkaat suliaqarfinnut ulorianartorsiorfiusunut, assersuutigalugu illunik niuernermet tunngasunut malunniuteqarlutik piorsagaasimanerat, akiliisinnaassutisip aningaasanillu tigoriaannarnik peqarnissamut piunasaqaatit eqqortinnissaannut ajornartorsiutinik nassataqartartoq. Aningaasanik aningaaserivimmiitineqartunik annertuumik amigartooruteqarnermikkut, aningaaseriviit amerlaqisut nunat tamat akornanni aningaasanik niuerfiit akuuffigisinnaanissaat pinngitsoorsinnaajunnaarsimavaat, taamaasillutillu tusaamanerlugaasinnaaneq sanngeequtigilersimallugu.

Danmarkimi Nationalbankip inunnit suliffeqarfinnillu Kalaallit Nunaanni angerlarsimaffeqartunit, aammalu aningaasanut tunngasunik suliaqartunit, nunanut allanut aningaasanik pissaqartunit akiligassaqartunilluunniit, imaluunniit pappialanik nalilinnik tunniussisimasunit pigisaqartunilluunniit, imaluunniit aningaasatigut niuerutinik ingerlataqartunik, oqimaaqatigiissitsisartunit akiliisartunilluunniit paasissutissat pissarsiarisinnaavai.

GrønlandsBANKEN-miit tusarniaanermut akissummi tikkuarneqarpoq, piginneqatigiiffinnit Kalaallit Nunaanneersunit Nationalbankenimut Danmarkimilu oqartussaasunut allanut paasissutissat elektronik atorlugu tunniunnissaannut periarfissiisumik aaqqiissutissatut siunnersuutinik sulii pigisaqartoqanngitsoq. GrønlandsBANKEN-ip kaammattuutigaa

nalunaaruteqartalersigatik ajornartorsiut tamanna aqqiivigineqassasoq. Taamaattumik 2012-ip naalernerani, kingusinnerpaamillu marts 2013-imi elektronik atorlugu aatsaat nalunaaruteqartalernissartik kaammattuutigaat.

Tamanna tunngavigalugu Naalakkersuisut innersuusutigaat Aningaasaqarnermut Nakkutilliisunut nalunaarutigineqassasoq Kunngip peqqussutaatigut Danmarks Nationalbank-i pillugu inatsimmut allannguutissatut siunnersuut, siunnersuutigineqarnermisut iluseqarluni Inatsisartut atuutilersissagaat.

Danmarkimi Nationalbanken pillugu inatsisip allanngortinneqarnissaa aalajangiunneqarpat, Kalaallit Nunaannut aatsaat atuutilissaaq 2012-ip naalernerani, taamaasillunilu GrønlandsBANKEN-ip kaammattuutaa eqqortinneqassalluni.

Taamaasillunga aalajangiussassatut siunnersuut Inatsisartunut oqaaseqarfigisassanngortippara.